



Botime të autores:

- 1-“Shiu i fundit” -Poezi
- 2-“ Nënqeshja e ëmbël” -Poezi
- 3-“Në akuj digjem” -Poezi
- 4-“U jepem udhëve”-Poezi
- 5-“Qielli i shpirtit tim”-Poezi



# Vera Istrefaj

## VESË SHPIRTI

\*\*\*

Redaktor  
**Gëzim Ajgeraj**

\*\*\*

Recensent  
**Ilam Berisha**  
**Ibrahim Skenderi**

\*\*\*

---

Lektore  
**Autorja**

\*\*\*

Kopertina  
**Klevis Istrefaj**



**Vera Istrefaj**

# **VESË SHPIRTI**

*Poezi*



**Botoi**  
***METAFORA***  
Zvicër, 2016

---

## **POEZIA SI PIKËLIM I BRENDSHËM I SHPIRTIT POETIK**

*Poezia e autores Vera Istrefaj, nuk vuan nga e kaluara e errët, nga izolimi, diktaturat e sistemet të cilat njëherë e përgjithmonë kanë përfunduar mallkimit të kohë-shkuarës.*

*Por as vargun nuk e vë për asnjë çast në shërbim të sistemeve apo politikave ditore, të cilat një ditë do të përfundojnë si ajo e shkuara, ndërsa vargjet dhe poezia mbeten të përjetshme.*

*Zëri i brendshëm i saj, që shkrihet si pikëllim shpirtëror dhe pikëlon vargjeve, është burimi i muzës për fjalën, e cila pasqyron individualitetin krijues të saj dhe botën prej nga ajo gjithmonë nisat me fjalën, për ta shkruar në poezi.*

*Vargun e trajton si një dritë në vizion, që buron nga një ndjenjë e brendshme shpirtërore, e cila rrjedh pandalshëm dhe merr trajtat e komunikimit me publikun e gjerë, si një rreze që përhap dritë.*

*Falë këtij individualiteti, ajo tashmë në poezinë e saj ka ngritur stilin dhe botën krijuese, e cila e bën të dallueshëm me individualitetin e saj krijues.*

**Vera Istrefaj: VESË SHPIRTI, botoi: Metafora, Prizren, 2016**

Vera Istrefaj, tashmë autore e disa librave me poezi, në vazhdimësi po shpalos vlera të artit letrar dhe të fjalës së bukur artistike, në poezi. Poezia, si shprehje dhe art i shpalosjes së ndjenjave të brendshme të botës njerëzore, në raport me jetën dhe kohën që jeton, autores i është bërë udhërrëfim kronik, brenda së cilës ajo paraqet ndjenjat dhe përceptimin e saj për jetën.

Nëpërmjet vargut të saj, ajo gjithnjë e më shumë, shpalos metafora të bukura, të cilat si tërësi në varg, japin peisazhe, shprehje, forma të prezantimit të gjërave, të cilat për kah akceptimi letrar, janë shumë të bukura: ... / *Dridhet zemra / si gjethe vjeshte / furtunave të shpirtit/... /Po fundosen ëndrrat/... IMAZH.*

Stili i metaforave, të cilat kjo poete i sjell, i takojnë metaforës brenda vargjeve, duke përdorur në vazhdimësi fjalorin e përditshmërisë së fjalëve.

Një formë shumë e pëlqyer dhe e aplikuar në poezinë e sotme moderne. Pra, autorja nuk vrapon pas fjalëve, por brenda vargjeve, ajo fsheh një botë të thellë metaforike, që vargut vibrojnë lehtëzi metaforat e muzës së një mendimi po aq të thellë, por me akcent të lehtë të kapjes së tyre, nga lexuesi: ... / *Tutje darë e mendimit/ librin e ëndërrave / mos ma shfleto! / S'po i gjej dot një varr/ Trishtimit /.../ ABSTRAKSION/*

Edhe libri “Vesë shpirti” që po vjen përpara lexuesit, vjen ndjeshëm, me ato vlerësime që u thanë më lart, por tani më me një profesionalizëm që brenda një finese të hollë të mendimit, shkrihet në vargje, një botë e tërë e poeteshës Vera Istrefaj.

***Poezia si shprehje e mirëfilltë e mendimit***

*.../ Në skërmitje dhëmbësh / akulli i kohës /*

*më mundon, / e zjarri i zemrës, bubulak /  
shkrumbon / Sa pak kërkoj nga jeta, / sa pak! / ... /  
E s`më ofron / Asgjë /.. / AKULLI I KOHËS /*

Dihet mirëfilli se tani më kjo autore, ka disa libra me poezi, dhe me individualitetin e vet krijues dhe poezisë që e prezanton, ka hyrë në radhët e krijuesve të cilët gjithnjë e më shumë po dëshmojnë e po lënë emër në letrat shqipe.

Kjo dëshmi, është fakti se ajo në vazhdimësi po krijon dhe prezanton përpara lexuesit, botën shpirtërore të saj, përmes vargjeve të bukura e artistike.

***Stuhisë së shpirtit tim  
veç vargu në rrëfim***

Dhe ky sukses i saj, e radhit atë në vlera të mirëfillta të vargut të krijuesve, që nuk i shkëputen artit, por jetojnë me të, pranë tij dhe e prezantojnë atë në vazhdimësi.

Poezia e Vera Istrefajt, si tërësi shpalos botën e njeriut tonë, të njësuar brenda artit të vargut, që si tërësi njësohet brenda metaforave të mendimit nga botëkuptimi i brendëshëm poetik.

Brenda këtij njësimi, e gjejmë kohën, krijuesin dhe hapësirën e saj dhe raportin me kohën. Dhe nga një botë individuale, vargu vjen e shndërrohet si mendim artistik, i kapshëm për realitetin shoqëror, të cilit i dedikohet. Megjithatë, përgjithësisht, poetja vargun e saj e nis nga brendia e vetë, si një shpalosje e brendshme individuale, pa ndonjë synim dhe personifikim të jashtëm.

*Le t'i nisin fjalët / pranga për to s`kam / Po më rimon shpirti / si ky shi mbi xham / Vargu fluturon / Petal më petal / Me rrezet e shpirtit / ngrohur e kam / e udhëtimin e tij / asgjë s`e ndal / (FLATRA NË FJALË).*

Pjesa më e madhe e poezive të kësaj poeteje, shpalosin dromca mendimesh të çastit, të cilat në përpunimin artistik të shpjosjes së tyre, marrin trajtat e vargut, duke shpërndarur me to, refrenin e ndjesisë individuale të përjetimeve të çastit dhe frymëzimit, që vjen si një burim i brendëshëm dhe i pashterrshëm tani më tek kjo poeteshë.

Kjo për faktin, se ajo tani më po vjen me librin e gjashtë të saj, dhe në vazhdimësi po dëshmon stilin dhe veçantinë e saj krijuese, brenda finesave në varg, duke dëshmuar ndjeshmëri të hollë për mjeshtrinë e artit të bërjes së poezisë.

Duke i lënë hapësirë lexuesit, për një imazh personal për vargun që do të lexojë në vazhdim, do të shkëpusim edhe disa vargje, për ta plotësuar atë që thamë më lart: / *Këngë e pakënduar / valë e zemrës sime / Në pentagram / dridhjet e shpirtit / Kujtimet / valëzojnë trazirave / Nostalgjia / rami mbizbrëzues / e etjes sime /*. (ZBRAZËTIRË).

Le t'i urojmë suksese dhe ngritje të vazhdueshme, vargut të poeteshës Vera Istrefaj, ashtu siç do t'i dëshironim edhe sukseseve të saj në artin e poezisë.

*Zvicër, janar, 2016*

\*\*\*

***NOSTALGJI***

Në palë të flokut  
ta kam fshehur prekjen  
e xheloze bëhem  
kur e përkëdhel erë e malit.

Gërshetat i kam shprishur  
për t'u vënë  
kurorën e mallit.

Xhevahir të rrallë  
kam prekjen tënde  
në palë të flokut  
lodruese mbi ballë  
\*\*\*

***NË PIKË TË LOTIT***

Të lë takim  
në pikën e vesës,  
në orën e trokitjes së zemrës.

Në pikë të djersës  
ia kam mbytur  
humbjen e shpresës

Dhe,  
në pikë të lotit  
kam pritjen për ty  
kripëzuar

---

\*\*\*

***MALL***

Jam në pritje.

Tringëllima e telefonit  
gurgullimë në veshë.

Çfarë pres?!

Ah,  
thirrjen tënde pres.

Nuk di  
ç'do të më thuash  
pas receptorit, në vesh.

Prej kohësh  
më cingëron tringëllima

Mbetur jam në pritje.

Nëse do të më thuash  
që bëra gabim  
e kuptoj.

S'ka rëndësi ç'do të thuash  
veç të mos zgjasë kjo pritje,  
kjo tringëllimë e heshtur.



Zhytur jam në punë  
e luks për mua janë  
mendimet në qetësi.

Ngrije receptorin,  
kjo ka rëndësi.

Nuk mund t'i lë gjërat pa emër.

Pas thirrjes tënde  
një mendje të hapur do të gjesh  
dhe një të tillë zemër

Unë po pres  
\*\*\*

### ***ÇASTE SHTERPË***

Sot më trokiti në derë  
një ligësi

Lehtas arriti të më ulet  
në vatër

Ma cingërrithi  
butësinë e shpirtit.

Më është ulur  
këmbëkryq  
e më zgërdhiet

e pa emra ligësi,  
ehhh, veç lotin kam stoli

Thuamë e paemër  
ç' do të sjellësh në jetë  
se je femër

Do zoti  
mbetesh shterpë  
me hazdisjen tënde.

\*\*\*

### ***IKJA E MOSHËS***

Filloi vjeshta  
të më flasë  
me fëshfërimën e gjetheve.

Zogjtë  
nxitojnë të prehen  
mbi ngjyrat e fundme  
të saj

Me gjuhën e pëshpërimave  
zogj e gjethe  
më flasin.

Ma ka zgjatur dorën  
mirësia  
si nëna bijve të saj.

Poshtë qerpikëve  
një lot kristal  
rrjedh pastaj.

\*\*\*

### ***TRASHËGIMIA***

Do ta shurdhoj botën  
me heshtjen time.

Dashakeqësit  
zvarrë do ti tërheq  
gurëve të jetës  
thep më thep  
të butësisë që kam,

Në ëndërra do tu dal  
herë engjëll, herë djall.

Mbretëroj sallon madhështor,  
në 49 metra katror.

Rrethuar jam me thjeshtësi  
kurora e dashurisë  
më ka hijeshi

Fuqi më japin  
dy engjëjt,  
djemtë e mi

\*\*\*

### ***ETJE***

---

Shpeshherë  
buzët më vrapojnë  
drejt rrëfimit  
dhe ndalen të kafshojnë  
njëra-tjetrën

Heshtje.  
Përlotja  
më krip plagën e shpirtit

Eshtë mbështjellë  
kjo vetmi vrastare  
me etjen time  
\*\*\*

### ***DHIMBJE E SHURDHËT***

Dhimbjen time  
çdo ditë  
e ujis me shpresë  
ëndërrat  
me buzëqeshje.

Në çdo çast  
jam vetja  
e për zili  
s'më zë etja.

Gjurmët e dhimbjes  
as bora e sivjetshme

---

nuk i mbuloi.

Yllin e mëngjesit  
strehuar kam në gji  
për të më ndriçuar  
natën me stuhi

\*\*\*

### ***DHIMBJES I RRËFEHEM***

Lotët e mallit  
e kanë kriposur  
zjarrin e dhimbjes time,

Etja shkrumbet  
shpirtit të plagosur.

Eh,  
shpirt-krisje kripëzuar  
malli im

Për TY, baba.

Kaq vite shkuan,  
prapë pas teje jam

si një fëmijë.

Nuk më vlejné vitet mbi supe,  
për të të harruar,  
as hallet e jetës.

---

Si një fëmijë  
para teje kam mbetur.

Nuk është vetëm mall  
ajo që më mundon,  
është shumë më tepër.

Nuk di  
nëse mund t'i vë emer.  
mungesës

Me dhimbjen  
Si kokërr kripe  
në zjarr  
po më plas kjo zemër.

Baba...

Ka kohë që nuk të kam vizituar  
Prehën e përjetësis tënde

Nuk mundem...

Të kam të gjalle, ketu... ne shpirt...

E ktheva koken sot....kur po udhetoja...  
Nga varri yt...

Ti e di ...Si të ndaloja....

---

Kur unë kuvendoj me ty çdo ditë?!

Jetojmë bashkë baba... jetojmë

Bashkë i marrim vendimet...  
në vetminë tonë të thellë.

E unë,  
Përherë para teje si një fëmijë...  
Dhimbjes i rrëfhem  
\*\*\*

### ***LODHUR***

Lodhur...lodhur...  
Mbi avujt e filxhanit  
përdridhet lodhja ime  
e trudhembja  
zhytet tymit të duhanit

Qerpikët  
takojnë sy-enjtjen

Lodhur...lodhur...  
Shpirti përpëlitet  
udhës së mendimeve,  
furisë së ndjesive,  
plagosur  
halleve pa sosur

\*\*\*

***NË KAFENE “Ulqini”***

Në kafene “Ulqini”  
kafenë rrufis,  
me fjetet e zemrës  
fjalët i qëndis

Në dritherimë zëri  
Vallëzon shpirti

Këtë mëngjes të freskët  
dielli prapuar,  
me magjinë e vargut  
unë duke vallëzuar

\*\*\*

***ASGJË NGA KJO DITË***

Në fund të ditës  
kuptova se...

Plot një orë  
qëndruam bashkë në kafene,  
por me kilometra  
ishim larg ne.

Vetëm një orë  
do të thuash ti,  
por e pafundme  
ishin ato çaste



plotë zbrazëti.

Folëm,  
u pamë  
por larg, larg ishim

Në mendje tani më vijnë  
perlat në qafë,  
të vetmet,  
që tek ti shndrijnë.

\*\*\*

### ***NJË TJETRE***

...taka të larta...  
...veshje të shtrenjta...

Sa më dhimbsesh!

Tani  
shokët po të njohin  
cila je,  
por nesër...

Nesër do të njohësh shokët  
dhe veten....

...kur këmbët t'i kesh përdhe.

\*\*\*

### ***JAM VETVETJA*** ***(shoqes time)***

---

Me është plagosur shpirti  
mikja ime

Ta them se kam arsye të mendoj

Fjala e pathënë  
ndodh të vrasë më shumë  
se ajo që thuhet

Ajo çfarë është mes nesh  
nuk ka vend për te tjerët

Më mirë  
ta lëmë siç është  
mbase të brishtë  
por të kthjellat

Retë e dyshimit, sugjerimit  
jashtë qiellit tonë të jenë  
ndryshe gjërat mes nesh  
ç' siguri do të kenë?

Jam vetvetja mike  
edhe në gabime unike

Ta dish, përherë  
dikush do të dojë para teje  
të më heqë një vlerë

Kam pak të tilla mikja ime  
Pak  
mbase si të gjithë rreth e qark

Mike  
nuk janë vëetimat  
ato që ujisin bimët

Eshtë shiu  
që rimon mbi to  
si lotët e mi sot.

Më është plagosur shpirti  
mikja ime  
e që t'i them të gjitha  
të mos kesh dyshime.

Mendjen e kam ndarë,  
por ku e lidha miqësinë  
mbeti si një nyje në litar

Këtë nyje do ta vuajmë,  
por bashkë

nëse mes nesh  
nuk do të gjejë vend  
as edhe një ashkë

Më është plagosur shpirti  
mike,

---

por për hir të miqësisë  
do ta kaloj dhe këtë dhimbje.

\*\*\*

## ***MISTER***

Kafenë  
e pimë apo na piu?

Buzë filxhanëve  
u varën shqetësimet tona,  
të thëna e të pathëna.

Mes miqsh,  
në trajta të ndryshme  
shkëmbyem shqetësime,  
madje  
i bëmë varg  
si nusja dikur petkat e pajës

Vargu i shqetësimeve  
na ndolli ndjesi  
që vargje nuk u bënë,  
nuk u bënë poezi,  
por u jetuan,  
ishin aty.

Duke heshtuar a duke folur  
do të na zinte hëna,  
por hallemadhja jetë  
na thirri  
si fëmijën nena.

Kafeja...  
e pimë apo na piu?

\*\*\*

## ***GJURMË E SHI***

Udhë pa udhë ky shi  
rrugëve të qytetit

Vjen drejt meje  
natyrshëm

Në buzë  
të çelen puthjet e mia  
të padhëna

Nëpër faqe lulojnë  
mollëzat e gishtave të mi,  
për prekje që s'u bënë  
zemra bëhet hi.

Ç'shi i shashtisur  
sythe dashurie  
duke plasaritur  
Një kurore me lule  
bashkë qenkan bërë,  
anekënd qytetit

fshehur paskan qenë  
nga frika e të nxehtit.

Edhe përçafimet  
nga trungjet e blirëve  
dolën zinxhirëve

I hazdisur ky shi,  
i zhuritur paska qenë qyteti,  
si unë e ti

Pikë e shiut  
lodron buzëve të mia,  
qerpikët dritojnë  
nga pika e kristaltë  
faqeve më kuqëlon  
ndjesi e përvaltë.

Eci bashkë me shiun,  
udhë pa udhë  
nëpër mendime

të lë ty dhe veten  
lule të një lëndine

Ky shi...

Shi vjeshte  
e zemra me dridhet  
nëpër heshtje

ç'shi i shashtisur

---

sythe dashurie  
duke plasaritur.

Sythe të gjorë...

Dëbora e kristaltë  
do t'u jetë kurorë...

\*\*\*

### ***LAKMI E USHQYER***

O, sa e madhe  
buzëqeshja ime!

Cep me cep të saj  
zvarrë ju tërheq  
langonj...

Jargët ju shkojnë  
tek më përflisni,  
duart iu dridhen

Stërkala nga goja juaj  
shpërthejnë....

Uf! Gërdi!

E unë, e vogla Verë  
si përherë  
ju mëshiroj  
nëpër buzëqeshje,

---

që çelur më kanë në buzë  
si pranverë  
\*\*\*

### ***DRITIM***

Flokëve të dëborës  
po më driton shpirti

Mbylli qepallat  
ta ndiesh puthjen time

Qepikëve  
lëre flokëborën,  
ta fshish  
mos e zgjat dorën.

Eshtë e lehtë prekja ime,  
peshë drithërime

Mbeta flokëborë  
me halle mbi kokë  
si kurorë  
\*\*\*

### ***THERJE SHPIRTI***

Halave të pishës  
po më theret shpirti

Zogjtë e paktë  
të fundit në shtegëtim

---



shkelin shpirtin tim

Një ndjenjë më mbëltoi  
nën hijen e saj

Medet ç`trazim  
ndjeva shpirtit tim  
\*\*\*

### ***DEHJE DËSHIRE***

Përkund deti dëshirën time  
dallgëve te tij  
si nëna foshnjen në gji.

Puhizë pranverore  
përflak faqet e mia.

Mbi supe  
mantel mbretëror kaltërsia.

Qetë...qetë...qetë...

Qetësisht vrulli nis udhëtimin  
nga dejet e mi  
në qiell  
mbi re.

Ujëdeti dëshirën ma deh.

Pasqyrë rrezore më verbon shikimin

---

freski kaltërore  
më rrëmben mendimin.

Bëhen bashkë  
dëshirë e mendim  
e udhëdetin marrin  
si delfin

\*\*\*

### ***PRITJE***

Trishtil  
në pellg të ujit  
pa flatra  
mbetur kam

Kalimtarët ecin  
e ndjesitë e tyre  
era i përllan.

Të thatë  
ata kanë mbetur,  
të tretur  
pa ndjesi,  
pa dritë në sy.

E unë,  
trishtil i mjerë  
pres një pranverë.

\*\*\*

***MALL PËR TY***

Pershendetje ime  
kristal m'u bë në buzë  
këtë mengjes të ftohtë.

Buzëqeshja e shikimi  
u nisën drejt teje ngrohtë.

Thjesht,  
thjesht për të treguar  
se jam e je aty,  
edhe nëse nuk flasim  
kjo nuk ka rëndësi  
\*\*\*

***DASHURI E PËRJETSHME***

Me puhizën e frymëmarrjes tënde  
heq pluhurin  
që koha ka vënë në shpirtin tim.

Njëzet vite bashkë  
e une prapë,  
si atëherë  
pres në këtë dimër  
një lule-pranvere

Ti,  
ma lexon dëshirën  
strukur në trurin tim

---

m'i çel dëshirat-lule,  
sythe në shpërthim

\*\*\*

### ***BUZË DRINAVE***

Jam përkundur  
mes dy Drinave  
në djepin e valëve të tyre,  
petalet e lulegjales  
mbulojë fytyre.

Ninullë  
këngën e zogut,  
aromën e blirit  
në palën e flokut.

Në rritje  
me veriun,  
mjergullën, borën e shiun.

Vrapojnë ditët e mia  
e unë prapë  
mes dy Drinave.

Dy Drinat dhe unë  
prapë aty,  
vec valët e tyre  
i kam në sy.

\*\*\*

### ***PËRKUNDJA E ËNDËRRAVE***

---

Shpirti më përkundet  
halleve.

Zogu  
nuk ma kendon më  
këngën e majit.

Aromë e blirëve  
është sosur,  
shpirti  
zog i plagosur.

Në krahë  
përkund ëndërrat  
e djemve të mi,  
vec para gëzimit të tyre  
mbetur kam fëmijë.

\*\*\*

### ***BIJVE TË MI***

Vrapuan vitet  
u rritët.

Unë,  
mbeta nënë e pagjumë.  
Meraku në zemër  
lule e paemër

Puthjet e mia  
janë më të thella  
edhe pse në faqe  
iu ka çelur “ferra”.

Më merrni në krahë  
si dikur juve unë  
e dashuria ime,  
lumë

Endërrat e mia  
kalërojnë realitetit

Eh, kjo ndjesi...!

Bijtë e mi,  
e pakushtëzuara  
e vetmja dashuri.

\*\*\*

### ***LIGËSI***

Ti  
që qurravitesh  
kofshëve lavresh,  
dole zinxhirësh?

Lehjet e tua,  
asgjë për mua.

Hidh pluhur, pa problem

---

guri i çmuar, njësoj vlen

Ti kot, ëndërrat e liga

i ndërren

\*\*\*

### ***NGRICA MENDIMESH***

U varën mendimet  
pemëve te qytetit,

degëve të tyre

u ngrinë

Mbeti koha ngurtësuar,

Kujtimi i akulluar

Gjalica

nuk shihet

Ecim kokëulur

në pritje të diellit

qoftë edhe i acartë

*18 dhjetor 2013*

\*\*\*

### ***ÇASTE VJESHTE***

Kaq shkujdesur

enden njerëzit rrugëve

të qytetit tim

Gjethet e pemëve  
supeve të tyre,  
fëshfërijnë

Kjo gjethnajë  
supet hapëron

Heshtazi,  
pa kuptuar  
... ca pika lot...

Rrëmbimthi bien  
trotuareve

E supet e njerezve  
nën peshën e halleve

Vjedhtazi  
veriu fryn

Supet e njerëzve mbledhur,  
gjethnaja në fëshfërimë...

\*\*\*

***DIKUJT...***

Pak më tej vështrimin  
hiqja prangat mendjes  
mos zijos mendimin  
si nje rob të ëndjes



Nëpër gojë  
të rrokullisen fjalë  
si zaret e ligësisë

Gozhdë e ndryshkur  
ke mbetur diku  
në trarët e vjetër të shtëpisë.

\*\*\*

### ***IKJE E DHIMBSHME***

*(Dedikim për Enkelejda Lapa)*

Lot në sy  
ke mbetur e dashur  
lot që nuk rrokulliset faqeve

Kripësia e tij  
ma zjarrmon plagën e shpirtit

Ikja jote...

Si ta quaj...

Asesi...

Ti je ketu,  
në qerpikun tim,  
lot në sy.

As deti nuk e qas

lotin tim

Në velat e shpirtit  
dhimbja për ty  
gjithonë në lundrim  
\*\*\*

### ***JO RËNIE***

Një jetë duke kafshuar  
dhimbje, fyerje...

Nuk po e përtyp dot  
edhe pse në sy  
nuk më shihni lot

Nëpër dhëmbë mbetet fjalë  
që nga buzët nuk mund të dalë

Truri në dilemë:  
Kështu,  
apo ti lëmë, të flenë?

Le të bien në një shtrat  
fyrje e dhimbje  
shterpë do të mbeten,  
pa emër.

Nuk kanë si ia dalin  
të më ulen në zemër!  
\*\*\*

***TYMOSJE HALLESH***

Më jep një cigare  
ta tymosim këtë jetë  
plot halle

Verdhëzuar  
lulet e shpirtit,  
të këputura  
këtë vjeshtë të mbrame

Tymnaje trunore  
trishtimi  
zënë për dore

Lëre hirin  
të bjerë  
plagëve të shpirtit,  
aty  
ku ëndërrat e shpresat rrinë  
mbytur në nikotinë

Më jep një cigare!  
Mos u cudit!

Të pijmë bashkë,  
hallet t'i mbysim me tym  
t'i japim ca sekonda vetes  
në përpëlitje  
halleve të jetës.

\*\*\*

***MBI GJETHE VJESHTE***

---

Mbi gjethe vjeshte  
plot ngjyra  
flutur krahëlehtë  
i nisa vargjet

Lumit të Vushtrisë  
duke i kundruar  
në kopshtin me mollë  
kopsht i mrekullisë

Po, po!  
Mbi një gjethe vjeshte,  
e tek i kundroja  
edhe ti mike, heshte

Lashtësia ilire  
na kishte zaptuar  
zemër e mendje  
Vargjet udhëtonin lumit  
plot ëndje

Gjethe vjeshte  
u bë zemra ime,  
shkundur mendimeve

Fantazinë e lashë,  
krenaria më shëtiste  
harqeve të urës së lashtë

Nëntë harqe...  
Ku janë katër të tjerë!  
Sot vargjet mbi gjethe-vjeshtë  
shumë shpejt  
mbi sythe-pranverë  
*Vushtri, tetor 2014*

\*\*\*

### ***GJURMË FJALËSH***

Buzë gotës  
mbetën gjurmët e fjalëve  
që kurrë nuk u thanë.

Avulli i frymëmarrjes  
i vë në dukje,  
si e akullt membranë

Mendimet shëtisin trurit  
e vështrimi ngrin  
mbi këtë mjergull gri

Torturueshëm  
di kjo mjegull qytetit,  
shpirtit më rri  
\*\*\*

### ***DIMRI***

Dimri  
përqafoi fuqishëm  
brishtësinë e supeve

---

Peshë e bardhësisë  
rëndueshëm  
ngrin vështrimet

Pas hapave nëpër qytet  
mbetet heshtja,  
heshtje që klith  
ngricave të shpirtit

Tutje në horizont  
ngrirë shpresa

Degëve të blirëve  
hallet nxijnë

*Stuhisë së shpirtit tim  
veç vargu në rrëfim*

### ***ABSTRAKSION***

Tutje darë e mendimit,  
librin e ëndërrave  
mos ma shfleto!

S'po i gjej dot një varr  
trishtimit

\*\*\*

***IMAZH***

Mbi liqe  
ngrida e zezë zuri vend

U terruan shpresat

Dridhet zemra  
si gjethe vjeshte  
furtunave të shpirtit

Po fundosen ëndërrat

\*\*\*

### **Ç`TRISHTIM**

Kjo mjergull  
si mjekra e plakut të moçëm  
na është varur shpirtit

Na i ftohu ëndërrat  
e na njomi trishtimin

Në dhimbje eshtrash  
shtrihet kjo mjergull,  
mjegullon vështrimin

Ç`trishtim

\*\*\*

### **SHPRESE**

Buzëqeshjes  
mos ia mbyll derën

Lëre të dritojë  
nëpër shpresë

Mbi trishtim lëre,  
si lule me vesë  
\*\*\*

### ***KUJTIME***

Mbi tym mendimi  
nje tufe dëborë  
flokëve si kurorë

Deshpërimin  
noton zemra

E në shpirt mbeten  
gjurmë të paemra  
\*\*\*

### ***VJESHTË NË SHPIRT***

I kanë ikur gjethet  
pemës së shpresës

Lulja zhuritur  
mungesës së vesës

Nisur në udhëtim

---



vjeshta e vonë,  
shpirtit të trazuar  
\*\*\*

### ***FLATRA NË FJALË***

Le t'i nisin fjalët  
pranga për to s'kam

Po më rimon shpirti  
si ky shi mbi xham

Vargu flutron  
petal më petal

Me rrezet e shpirtit  
ngrohur e kam  
e udhëtimin e tij  
asgjë s'e ndal  
\*\*\*

### ***Ç`TI JAP ETJES?***

Shpirti,  
kjo letër ku dhembja shkruan

Zemrës  
i jep flatra veç gëzimi

Nga mendimi  
truri vuan

Më pushton trishtimi

Ç`ti jap etjes?

\*\*\*

### ***AKULLI I KOHËS***

Në skërmitje dhëmbësh  
akulli i kohës  
më mundon,  
e zjarri i zemrës, bubulak  
shkrumbon

Sa pak kërkoj nga jeta,  
sa pak!

E s`më ofron  
asgjë

\*\*\*

### ***KRISTAL NË SY***

Më mbetën sytë  
drejt derës

Pres të më vish  
si syth i pranverës

Mureve të zemrës  
përplaset etja për ty

E portreti yt,

---

kristal në sy,  
imazh

\*\*\*

***NË PRANVERËN  
E SHPIRTIT***

Livadhet e ndjenjave  
më blerojnë  
çdo pranverë

Pas cdo dimri  
zemra me çel

E pranvera e hershme  
bleron shpirtit

Si një kopësht me lule  
ku dehemi ne të dy

\*\*\*

***ZBRAZËTIRË***

Këngë e pakënduar  
valë e zemrës time

Në pentagram  
dridhjet e shpirtit

Kujtimet  
vallëzojnë trazirave

Nostalgjia,  
ra mbi zbrazëtinë  
e etjes sime

\*\*\*

### *IMAZH NË IKJE*

Pendë të argjendta  
zogjtë e shpirtit

Edhe kalimin dembel  
nga teli në tel

Gjalica rëndon  
nën të bardhin mantel

Dimri po rrëshqet  
duke mbretëruar  
nën këmbë tona

\*\*\*

### *ACAR*

Kjo vjeshtë  
la gjurmë në shpirtin tim

Etjen  
nuk ma shoi  
shija frutore

E tani,  
etjen ma ngriu në buzë

---

një flokëz dëbore

Një putje e acartë  
ngriu qiellit,  
puthje e kristaltë  
\*\*\*

### ***KRAHASIM***

Stinën e mjergullës  
të gjatë e pati ky vit,  
mjaft të gjatë

E ftohtësinë  
lak në fyt.

Tymnajë  
në kokat e njerëzve,  
tymnajë.

Ç`ti japim qiellit  
në këtë etje shekulli?

Përpëlitet etja  
në funde oqeanore,  
e tymnaja jonë  
na tërheq për dore.



**Përmbajtja e librit:**

Fjala e redaktorit.....	5
<i>NOSTALGJI</i> .....	11
<i>NË PIKË TË LOTIT</i> .....	12
<i>MALL</i> .....	13
<i>ÇASTE SHTERPË</i> .....	15
<i>IKJA E MOSHËS</i> .....	16
<i>TRASHËGIMIA</i> .....	17
<i>ETJE</i> .....	18
<i>DHIMBJE E SHURDHËT</i> .....	19
<i>DHIMBJES I RRËFEHEM</i> .....	20
<i>LODHUR</i> .....	23
<i>NË KAFENE “ Ulqini”</i> .....	24
<i>ASGJË NGA KJO DITË</i> .....	25
<i>NJË TJETRE</i> .....	26
<i>JAM VETVETJA</i> .....	27
<i>MISTER</i> .....	30
<i>GJURMË E SHI</i> .....	31
<i>LAKMI E USHQYER</i> .....	34
<i>DRITIM</i> .....	35
<i>THERJE SHPIRTI</i> .....	36
<i>DEHJE DËSHIRE</i> .....	37
<i>PRITJE</i> .....	38
<i>MALL PËR TY</i> .....	39
<i>DASHURI E PËRJETSHME</i> .....	40
<i>BUZË DRINAVE</i> .....	41
<i>PËRKUNDJA E ËNDËRRAVE</i> .....	42
<i>BIJVE TË MI</i> .....	43
<i>LIGËSI</i> .....	44

<i>NGRICA MENDIMESH.....</i>	<i>45</i>
<i>ÇASTE VJESHTE .....</i>	<i>46</i>
<i>DIKUJT.....</i>	<i>47</i>
<i>IKJE E DHIMBSHME.....</i>	<i>48</i>
<i>JO RËNIE.....</i>	<i>49</i>
<i>TYMOSJE HALLESH.....</i>	<i>50</i>
<i>MBI GJETHE VJESHTE.....</i>	<i>51</i>
<i>GJURMË FJALËSH.....</i>	<i>53</i>
<i>DIMRI.....</i>	<i>54</i>

***Stuhisë së shpirtit tim  
veç vargu në rrëfim***

<i>ABSTRAKSION.....</i>	<i>56</i>
<i>IMAZH.....</i>	<i>57</i>
<i>Ç`TRISHTIM.....</i>	<i>58</i>
<i>SHPRESË.....</i>	<i>59</i>
<i>KUJTIME.....</i>	<i>60</i>
<i>VJESHTË NË SHPIRT.....</i>	<i>61</i>
<i>FLATRA NË FJALË.....</i>	<i>62</i>
<i>Ç`TI JAP ETJES?.....</i>	<i>63</i>
<i>AKULLI I KOHËS.....</i>	<i>64</i>
<i>KRISTAL NË SY.....</i>	<i>65</i>
<i>NË PRANVERËN E SHPIRTIT.....</i>	<i>66</i>
<i>ZBRAZËTIRË.....</i>	<i>67</i>
<i>IMAZH NË IKJE.....</i>	<i>68</i>
<i>ACAR.....</i>	<i>69</i>
<i>KRAHASIM.....</i>	<i>70</i>



**Botime të autores:**

- 1 - “Shiu i fundit” -Poezi
- 2 - “ Nënqeshja e ëmbël”-Poezi
- 3 - “Në akuj digjem” -Poezi
- 4 - “U jepem udhëve”-Poezi
- 5 - “Qielli i shpirtit tim”-Poezi

**Vera Istrefaj**

**VESË SHPIRTI**

Faqe; 74

Madhësia: 14 X 21

Shtëpia botuese: **Metafora**, Zvicër, 2016